



Komunikadu Imprensa
Tribunál Judisiál Primeira Instánsia Oekusi
24 Outubru 2024

**Tribunál Judisiál Primeira Instánsi Oekusi primeiravés aplika devér adisionál
ba kondenadu iha krime aktu seksuál ho adolexente**

Iha 18 Outubru 2024, Tribunál Judisiál Primeira Instánsia Oekusi kondena arguidu ba kazu krime aktu seksuál ho adolexente ho pena prizaun tinan 1 fulan 8 suspende ba tinan 2 no mós aplika devér adisionál atu arguidu halo limpeza iha sede suku fulan 1 dala 1, iha inísiu fulan durante fulan 6 nia laran.

Iha kazu ne'e prokuradór akuza katak Iha loron no fulan ne'ebé la apura maibé iha tinan 2021, arguidu ho ofendida fó número telefone ba malu. Bainhira arguidu fila ba uma arguidu telefone ofendida hodi ko'alia liuhosi telefone durante minutu tolu-nolu (30) nia laran no arguidu mós konvida ofendida atu hasoru malu.

Iha loron tuir mai arguidu ho ofendida hasoru malu iha seño ida nia uma, arguidu ho ofendida tama ba kuartu laran arguidu ho ofendida rei malu.

Iha okazisaun seluk ne'ebé la apura loron akontesementu, maibé iha fulan Setembru 2021, nafatin iha uma ne'ebé hanesan arguidu ho ofendida ida-idak hasai nia roupa no arguidu ho lezada halo relasaun seksuál.

Prokuradór akuza arguidu kontra artigu 178 Kódigo Penál kona-ba aktu seksuál ho adolexente ho moldura penál to'o tinan 5 no artigu 41 alinea 1, 2 Kódigo Penál kona-ba krime kontínuadu.

Iha prosesu julgamentu arguidu konfesa integralmente ba faktu hotu iha akuzasaun no deklarasaun katak antes prosesu ne'e tama iha tribunál arguidu ho ofendida nia família rezolve ona problema ne'e tuir kultura Timor nian. Arguidu informa katak arguidu fó osan US\$800.00 ba ofendida ninia família no ofendida ninia família mós fó tais mane ida ba arguidu no arguidu mós promete bainhira ofendida akaba nia estudu sekundária arguidu sei kaben ho ofendida. Nune'e iha tinan 2024, arguidu ho ofendida hola malu no moris hamutuk hanesan feen ho la'en.

Alende ne'e, ofendida kontinua konfirma faktu iha akuzasaun no konfirma mós arguidu nia deklarasaun katak antes ne'e sira rezolve ona tuir kultura Timor nian arguidu fó osan US\$800.00, no iha tinan 2024, arguidu ho ofendida moris hamutuk ona hanesan feen ho la'en.

“Ne'e primeiravés iha Tribunál Judisiál Primeira Instánsia Oekusi, mezmu antes ne'e iha tinan sira liuba tribunál aplika ona regra ba konduta ka devér adisionál, maibé ne'e ba kazu violénsia doméstika de'it. Enkuantu ba kazu aktu seksuál ho adolexente foin primeiravés no JSMP konsidera hanesan mudansa pozitivu ida, maibé tribunál presija konsidera mós ba gravidade hosi kada krime” dehan Sr. Casimiro dos Santos, Diretór Ezekutivu Interinu JSMP.

JSMP fiar katak sentensa ne'ebé inklui devér adisionál sei asegura arguidu atu kumpri desizaun tribunál ne'ebé aplika ba arguidu, devér adisionál nu'udar meu prátiiku ne'ebé fasil liu atu kontrola kondenadu no sei prevene arguidu/kondenadu atu la repete ninia hahalok ne'e iha futuru.

Iha tinan sira antes JSMP sempre rekomenda ba tribunál atu bainhira kondena arguidu sira ho pena prizaun ninia ezekusaun suspende, presija aplika mós regra ba konduta ka devér adisionál, tanba bainhira la aplika sei la fó efeitu ba arguidu atu sente katak pena ne'ebé aplika ba arguidu hanesan kastigu ida. Mezmu tuir loloos supensaun ne'e hanesan kastigu ida mós, maibé tanba laiha mekanizmu kontrolu ida ne'ebé mak di'ak no laiha esplikasaun ida ne'ebé klaru sei la produs efeitu ruma ba arguidu.

JSMP rekomenda ba tribunál atu iha desizaun ba kazu sira ne'ebé substitui ho suspensa presija aplika regra ba konduta ka devér adisionál bazeia ba artigu 69 no 70 Kódigu Penál, atu bele iha efeitu ba arguidu sira.

Kazu ne'e rejista iha tribunál ho Nú. Prosesu: 0121/22.OESIC. Julgamentu leitura sentensa ne'e prezide hosi juis singulár, Dr. Evangelino Belo, Prokuradór representa hosi Dr. Claodino do Rosario no arguidu hetan Defeza hosi Dr. Calisto Tout hosi Defensória Públiku.

Atu hetan informasaun kompletu favor kontaktu:

Casimiro dos Santos
Diretor Ezekutivu Interinu JSMP
Diresaun e-mail: casimiro@jsmp.tl
Telefone: (+670) 33238883/77257466
Website: <https://jsmp.tl>
info@jsmp.tl